

یوہ آکاشوانی جموں بے باغ علی طاہر تیں خبر سُنو۔

CENSUS

جموں کشمیر مانہہ خود شماری غا مرحلہ غا اختتام غے بعد اج یعنی پہلی جون تیں باقاعدہ طور ور کہراں غا اندراج تے شمار کیا جان غو مرحلو شروع ہو گیو ہے۔ کپر کوٹھاں تے آبادی غا اعدادو شمار جمع کرن غا سلسلہ مانہہ پورا جون مہینہ غے دوران شمار کنندگان تے نگران عملہ غا افراد یوٹی مانہہ کپر کپر جاغے مردم شماری غا اس مرحلہ نانہہ مکمل کریں گا۔ عہدیداراں نے رہائشیاں ور زور پایو ہے جے وے مردم شماری غا اس مرحلہ غے دوران شمار کنندگان تے نگران عملہ سنگ مکمل تعاون کریں تانجے درست اعدادو شمار اکٹھا کرن نانہہ یقینی بناویو جاسکے۔ واضع رہ جے مردم شماری غے دوران اکٹھی کی گئی آبادیاتی معلومات غی مدد سنگ ترقیاتی سکیمیں بارے بہتر منصوبہ بندی بہتر عمل آوری تے انتظامی امور مانہہ بہتری آئی جاسکے غی۔

EXFILTRATION BID FOILED

فوج تے جموں کشمیر پولیس نے اک سانجی کاروائی غے دوران ضلع بارہمولہ غا اوڑی سیکٹر تیں بنو پار کیا جان غی اک کوشش نانہہ ناکام بنادتو ہے۔ چنار کور نے سماجی میڈیا غی اک پوسٹ ور جانکاری دینا واں دسیو ہے جے اک خاص سومنن ور سلامتی دستاں غی طرفوں علاقہ مانہہ ایک سانجی تلاشی کاروائی شروع کی گئی۔ جس غے دوران سو پور تیں 2 افراد نانہہ اُن غا گائیڈ سمیت گرفتار کرلیو گیو، دسیو گیو ہے جے یہ ترے افراد مُلک دشمن ادارہ سنگ اوڑی سیکٹر تیں بنو پار کرن غا فراق مانہہ تھا۔ اس سلسلہ مانہہ مزید تحقیقات کی جارئی ہے۔ اسے دوران اوڑی سیکٹر تیں ہی مقبوضہ کشمیر تیں دراندازی کرن آلا اک شخص نانہہ فوج نے حراست مانہہ لے لیو ہے۔ عہدیداراں نے دسیو ہے جے کنٹرول لائنیں تیں اُراں آن غی کوشش غے دوران چنار کور غا چوکس دستہ نے اس شخص نانہہ گرفتار کرلیو تے بعد مانہہ مزید قانونی کاروائی غی خاطر پولیس غے حوالے کردتو گیو۔

KHET BACHAO ABHIYAAN

جموں ڈویژن مانہہ کساناں غی امداد تے پائیدار زراعت غا فروغ غی خاطر اج تیں اک مہینہ توڑی کھیت بچاؤ مہم غو آغاز ہو گیو ہے۔ مرکزی وزیر شیوراج سنگھ چوہان نے متعلقہ عہدیداراں نانہہ ہدایت کی ہے جے اس مہم غے دوران کساناں مانہہ بیداری پیدہ کرن تے ملک پپر غا گرایاں کھیتاں تے کساناں نانہہ جوڑن غو مقصد حاصل کرن غی کوشش کیا جان غی لوڈ ہے۔ ڈائریکٹر ایگریکلچر جموں انیل گپتا نے اس مہم غی تیاری گا سلسلہ مانہہ منعقدہ کی گئی ا ک میٹنگ مانہہ بولتا واں زمین غی زرخیزی، کمیائی کھاداں مانہہ کمی کرن تے زمینی سطح ور تکنیکی صلاح جیسا معاملہ ور لوہ پائی، بکھ بکھ شعباں سنگ منشلک یہ ٹیم پنچائیتاں گو دورو لاغے کساناں نانہہ زراعت بارے صلاح مشورو دیں غی۔ نالے قدرتی کاشتکاری بکھ بکھ فصل اُگایا جان غا عمل تے ماحولیاتی تبدیلیاں گو مقابلو کرن آلی زرعی سرگرمیاں بارے جانکاری مہیا کرواویں غی۔ اس مہم غے دوران کسان کرڈیٹ کارڈ تے پی۔ایم کسان بارے وی کساناں نانہہ بیدار کیو جائیگو۔

8th PAY COMMISSION

ویں مرکزی تنخواہ کمیشن جھڑی جموں کشمیر غا دورہ ور ات موجود ہے۔ اج سویر 11 بجیں 8 تیں بعد دوپہر اک بجے توڑی شیر کشمیر بین العوامی کنونشن مرکز سرینگر مانہہ جموں کشمیر سرکار سنگ اک میٹنگ منعقد کرے غی۔ چیف سیکرٹری غی قیادت مانہہ اک اعلیٰ سطحی ٹیم کمیشن نانہہ تجویز پیش کرے غی۔ جس مانہہ انتظام عامہ قانون تے خزانہ محکماں غا سنئیر افسر موجود ویں گا۔ 5 جون توڑی اپنا دورہ غے دوران تنخواہ کمیشن اس توں علاقہ سرکاری ملازماں یونیناں تے ایسوسی ایشن غا نمائنداں سنگ وی میٹنگ لاغے اُن غا نُکتہ نظر غو پتو لاوے گو۔

IGP SANJAY

جموں زون غا انسپکٹر جنرل پولیس بہیم سین ٹوٹی نے کل امرناتھ یاترہ 2026 بارے ضلع کٹھوے تے سامبہ مانہہ حفاظتی تے سہولیتی انتظامات غو جائزو لیو۔ انہاں نے پولیس تے سیول

انتظامیہ غا سنئیر افسراں غے ہمراہ بُنیادی کیمپاں لنگراں اندراج مرکزیاں تے لکھنپور استقبالیہ سہولتاں غو جائیزو لیو۔ ائی۔جی۔پی موصوف نے حفاظتی اقدامات غا سلسلہ مانہ سی۔سی۔ٹی۔وی کیمراں تلاشی عمل ٹریفک بندوبست تے بنگامی رد عمل غا منصوبیاں غی تیاریاں گو جائیزو لیو۔افسراں سنگ کی گئی جائیزہ میٹنگ غے دوران اُنہاں نے زیادہ توں زیادہ چوکسی برتن ٹرون غے ذریعے بہتر نگرانی کیا جان تخریب کاری غی روک تھام غا اقدام تے حفاظتی ایجنسیاں غا آپشی نزدیکی رابطاں غی ضرورت ور زور پایوتانجے باحفاظت یاترہ نانہ یقینی بنايو جاسکے۔

IPL CRICKET

ائی۔پی۔ايل کرکٹ غا فائنل مقابلہ مانہ گزشتہ رات رائیل چیلنجر بنگلورو نے گجرات ٹائٹن غی ٹیم نانہ براغے لگاتار دو جے سال خطاب اپنا ناں کرلیو ہے۔ یوہ مقابلو نریندر مودی سٹیڈیم احمد آباد مانہ کھیڈیو جے غوپہلاں بلے بازی کرتا واں گجرات ٹائٹن غی ٹیم مقررہ 20 اوراں مانہ 1 سو 55 دوڑ ہی بنا سکی۔ واشنگٹن سنڈر نے 37 گینداں مانہ سب توں زیادہ 50 دوڑ بنائیں۔ جواب مانہ رائیل چیلنجر بنگلورو غی ٹیم 18 اوراں مانہ ہی 161 دوڑ بنا غے فتح یاب بوگئی رائل چیلنجر غی ٹیم مانہ 42 گینداں ور 75 دوڑ بنا غے وراٹ کوہلی سر فہرست رہیا۔

WEATHER

محکمہ موسمیات نے آئندہ 3 جون توڑی موسم زیادہ تر خشک رہن غی پیشن گوئی کی ہے اُس غے بعد 4 تے 5 جون نانہ بارش تے اندھی چکھڑ غا نواں مرحلہ غی شروعات غو امکان ہے۔ 6 تیں 8 جون توڑی موسم زیادہ تر خشک رہن غی امید ہے۔

NEWS READ BY BAGH ALI TAHIR
NEWS EDITOR ABHILASHA SHARMA
DEO NUSRAT
SKILLED RAJAT